

1.13 YAKHAUJ ROV QAB LOS TSEV

Chivkeeb 31, 32 thiab 33

Yakhauj rov qab los txog lub tebhaws uas nws niam lawv nyob. Nws tau mus ntsib dablaug Lanpas uas yog nws niam tus nus thiab yuav kiag dablaug ob tus ntshais uas yog Le-as thiab Laxees ua nws pojniam. Ntau lub xyoo tag los, nws niaj hnub ua haujlwm rau dablaug Lanpas. Tiamsis Lanpas ua tsis ncaj rau Yakhauj. Vajtswv hais kom Yakhauj rov qab los rau lub tebhaws uas niam thiab txiv lawv nyob, nws yawg yog Aplaham. “Kuv yuav nrog nraim koj” Vajtswv hais li ntawd.

Lanpas npau taws heev rau Yakhauj vim Yakhauj ua yam twg los tau noj. Yog Lanpas muab tsiaj los paj nqi zog rau Yakhauj, ces Yakhauj tej tsiaj yuav loj hlob zoo thiab huamvam ntxiv. Yog Lanpas txia txim siab muab paj tsiaj faib rau nws thiab Yakhauj los Yakhauj paj tsiaj yuav zoo nkauj tshaj.

Zaum no Le-as thiab Laxees nkawd uas yog Yakhauj pojniam los yuav nrog Yakhauj los rau nws lub tebhaws. Yakhauj ob tus pojniam hais tias “Txiv yuav tsis faib ib yam dabtsi rau peb li. Koj kavtsij koj peb mus raws li tej uas Vajtswv tau hais rau koj.”

Yakhauj thiaj tsaws nkaus cov niam tub rau saum tej ntshuav raub qaum. Cia tagrho paj tsiaj ua lawv ntej. Nws mam li sawbsim tej qhov txhia chaw caum lawv qab. Lawv thiaj li nrawm nroos tawm hauv lub tebhaws ntawd rov qab los rau tebhaws Kana-as, yog lub zos uas nws txiv Ixaj lawv nyob.

Thaum Lanpas paub tias lawv nyias khiav hmo ntuj los tag ntawd, nws thiaj li raws qab tuaj caum cuag, nws hais rau Yakhauj hais tias “Ua cas koj yuav koj kuv ob tus ntshais thiab cov xeebntxwv khiav los lawm?” Yakhauj teb Lanpas hais tias, Kuv twb ua haujlwm rau koj tau nees kaum lub xyoo lawm. Kuv ua haujlwm tiv tshav tiv nag, ntuj kub ntuj no. Tiamsis koj ua txiv ua tsis ncaj rau kuv. Kuv thiaj li khiav ceev nrooj los lawm tiag, rau qhov ntshai tsam koj yuav ua nyaum heev yuam kuv cov niam tub rov qab.”

Ntawm Vajtswv ntsia ntoov, Yakhauj thiab Lanpas tau sib pom zoo thiab lawv noj ib pluag mov ua ke. Lawv sib tham haum tias yuav tsis sib ua plaub lawm. Lawv thov Vajtswv nrog lawv ua povthawj rau lawv cov lus. Lanpas thiaj puag nkaus nws ob tug ntshais thiab cov xeebntxwv nwj thiab foom koob hmoov rau lawv tagrho. Ces Lanpas rov qab los tsev lawm.

Yakhauj lawv rov qab taug kev los. Nws paub tias nws yuav ntsib nws tijlaug Exaus nta kev xwb, nws thiaj tso neeg thiab npaj ib cov khoom plig los ua ntej paj rau tijlaug. Yakhauj tseem nco ntsoov qhov nws dag tijlaug kom tau leejtxiv foom koob hmoov tau ntau xyoo los. Nws thiaj ntshai tsam tijlaug tseem npau taws rau nws.

Yakhauj pom Exaus tabtom taug kev tuaj ze zug zug rau ntawm Yakhauj thiab plaub puas tus tub rog! Yakhauj ntshai tsam tijlaug yuav tua lawv. Nws thiaj li thov Vajtswv los paj lawv kom dim ntawm lawv tijlaug txhais tes. Thaum Exaus, uas yog Yakhauj tijluag pom lawv, Yakhauj thiaj txhos caug dua ti nkaus hauv av pe nws. Exaus thiaj li ya loos los tsa nws. Exaus puag nkaus nws nwj. Nkawd ob kwvtij sib puag quaj lawm xwb.

Yakhauj thiab Exaus cia li sib ncaim. Yakhauj ncaj qha los rau hauv lub qub zos. Exaus mus rau nws lub zos lawm.

Yakhauj thov Vajtswv paj nws. Vajtswv tsomkwm Yakhauj lawv tsev neeg raws li Vajtswv tau coglus tseg. Vajtswv yog tus paj Yakhauj dim ntawm nws tijlaug txhais tes. Exaus zam txim rau Yakhauj thiab lawv ua neej sib hlub. Thaum peb thov Vajtswv paj peb. Vajtswv yuav teb peb tej lus thov ib yam li ntawd.

1.13 YAKHAUJ LOS TSEV – RAU TUS QHIA

Chivkeeb 31, 32 thiab 33

Tej tseem ntsiab lus:

- 1) Yakhaus ua haujlwm rau dablaug Lanpas tau ntau xyoo. Lanpas pib ua tsis ncaj rau yakhaus. Vajtswv hu Yakhaus kom rov qab los nws lub tebchaws. Vajtswv hais rau Yakhaus tias, “Kuv yuav nrog nraim koj.”
- 2) Yakhaus nrawm nroo coj cov niamtub, tej tsiaj txhu thiab qhov txhia chaw khiav los hmo ntuj. Thaum Lanpas paub tias lawv khiav tag nws thiaj raws qab caum.
- 3) Lanpas hais tias “Ua cas koj yuav coj kuv ob tus ntshais thiab cov xeebntxwv khiav los?” Yakhaus teb, “Kuv twb ua haujlwm khwv heev rau koj ua txiv tiamsis koj ua tsis ncaj rau kuv. Kuv ntshais tsam koj yuav caum cuag thiab yuam kuv cov niam tub rov qab kuv thiaj khiav los.”
- 4) Ntawm Vajtswv xubntiab, Yakhaus thiab lanpas sib pom zoo. Nkaws sib pom zoo tias yuav tsis sib ua plaub. Vajtswv ua nkawd tus povhawj nkawd tej lus hais tseg. Lanpas puag nkaus ob tus ntshais thiab cov xeebntxwv nwj thiab thov foom koob hmoov rau lawv. Tom qab ntawd yawg rov los tsev lawm.
- 5) Yakhaus paub hais tias yuav rov los ntsib nws tijlaug Exaus xwb. Nws ntshai tsam Yakhaus tseem npau taws rau qhov nws txais tau leejtxiv tej lus foom koob hmoov lawm. Thaum lawv sib ntsib ces Yakhaus txhos caug pe. Tiamsis Exaus los tis nkaus ntawm nws leejkwv thiab puag nkaus sib qawg quaj. Exaus twb zam txim rau nws leej kwv lawm.

LUS NUG:

- 1) Dabtsi ua rau Yakhaus rov qab los nws lub tebchaws?
- 2) Thaum Lanpas paub tias lawv khiav tag nws ua dabtsi?
- 3) Ntawm Vajtswv xubntiag, Lanpas thiab Yakhaus sib pom zoo li cas?
- 4) Thaum Yakhaus lawv rov los ua cas Yakhaus yuav ntshai ua luaj?
- 5) Thaum pom dheev Yakhaus uas yog nws leej kwv Exaus ua li cas?

LUS TEB:

- 1) Vim Lanpas ua tsis ncaj nws rov qab los nws lub tebchaws.
- 2) Thaum paub tias Yakhaus lawv khiav tag Lanpas raws caum lawv qab.
- 3) Ntawm Vajtswv xubntiag, Lanpas thiab Yakhaus sib pom zoo tsis sib ua plaub lawm.
- 4) Yakhaus ntshai rau qhov nws yuav ntsiv nws tiajlaug Exaus.
- 5) Thaum Exaus pom dheev Yakhaus nws puag nkaus, nkawd sib qawg quaj.

Esxos zamtxim rau nws tus tijlaug Yaskhaus qhov nws dag nws txiv, txoj kev zamtxim yog yam uas Vajtswv txaus siab.